

• sawcuenh •

Doxduenq Youq Ngoenzcog

相约明天

□ Danz Hijvah / 谭喜花

Vunz lai bak cab, sim vunz naemj mbouj doxdoengz, mbangj boux ndenq hawj dahsau maenz ndeu haj maenz cungj miz, mbangj boux muenghyawj saek yaep couh byaij deuz.

Daenggangz youq ndaw vunzlai muengh coh dahsau, danq gaemz heiq he.

Mbwn fuemx lo, gwnzmbwn doek fwnmoenq, seizneix roxnynh engq nit lo, dahsau haenx baenq ndang yaek byaij deuz. Daenggangz byaij gvaqbae, heuh naeuz: “Dahnuengx, caj gou yaep ndeu.”

Dahsau doeksaet muenghyawj Daenggangz, ndwn youq gizhaenx mbouj guhsing.

“Dahnuengx, gou siengj bang mwngz, mwngz daiq gou bae ranz mwngz yawjyawj, ndaej lwi?” Daenggangz naeuz.

Dahsau muenghmuengh Daenggangz, roxnynh mbouj lumj vunz-rwix, sing iq naeuz: “Ndae.”

Daenggangz riengzlaeng dahsau bae, dahsau youq aen ranz iq he dingz roengzdaej, yaeng’ yaeng hai dou haeujbae. Ndawranz gig laep, lwgsai iq he byombyengbyeng boemz ninz youq gwnz cik daiz daemq he.

Dahsau naeuz: “Neix dwg daengnuengx gou, baenz bingh youq ranz, mbouj ndaej bae hagdangz doegsaw.”

Laxlawz, mbanjranz dahsau youq Huznanz, daj iq caeuq daengnuengx riengz bohmeq okrog daeuj. Daxboh youq dieghong daj gwnzgaq doek roengzdaej, deng sieng gig naek, mbouj nanz couh gvaqseiq lo. Daxmeh souh mbouj ndaej daxboh biek bae, baenz baez bingh naek he, hix riengzlaeng daxboh bae lo. Seizneix dahsau gauj hwnj daihhag, naemj youq neix doq doegsaw doq dajgoeng ra cienz caeuq ciuqgoq daengnuengx. Hoeng boux ndeu guh mbouj ndaej baenzlai, seizneix cij ndei gouz vunzlai bangcoh. Dahsau gangj sat, baenq naj gvaq mbiengj he bae, aeu fwngz mad lwgda.

“Dahnuengx, daengnuengx baenz bingh, seizneix aeu soengq de bae yihiyen yawj bingh gonq.” Daenggangz naeuz.

“Bae yihiyen yawj bingh sai cienz, gou mbouj miz baenzlai cienz.” Dahsau naeuz.

“Gou ok cienz bang mwngz gonq, daengzcog mwngz doegsaw okdaej guhhong rom ndaej ngaenz caiq gangj.” Daenggangz riu naeuz.

Daenggangz caeuq dahsau soengq daengnuengx daengz yihiyen, canghyw naeuz daengnuengx bingh naek lai, aeu youq yihiyen yw cijndaej.

Daenggangz daj ndawdaeh dawz

mbaw gajngaenzhangz ndeu ndenq hawj dahsau, naeuz: “Dahnuengx, daengnuengx baenz bingh aeu cienz yw, mwngz doeg daihhag hix aeu yungh cienz, mbaw gajngaenzhangz neix miz haj fanh maenz ngaenz, mwngz dawz bae yungh gonq.”

“Daeggo, gou baenzlawz ndaej aeu cienz mwngz.” Dahsau vad fwngz naeuz.

“Mbouj gangj baenzlai lo, daengz cieng lo, gou dauqranz lij miz saeh aeu banh.” Daenggangz doq byaij deuz doq naeuz.

“Daeggo, gou heuh Vangz Cinggyah, mwngz heuh maz coh? Ce aen dienhvah hawj gou.” Dahsau gyaep gvaqdaej.

“Cinggyah dahnuengx, gou singq Liengz, cohnoix heuhguh Daenggangz, danghnaeuz miz yienzfaenh, daengzcog cungj miz ngoenz ndeu raeuz ndaej caiq doxraen.” Daenggangz gangj sat gig vaiq couh byaij bae gyae lo.

Dawz haj fanh maenz ngaenz bang Vangz Cinggyah, seizneix Daenggangz cij lw cib fanh maenz ngaenz dauqranz lo. Daenggangz mbouj roxnynh miz maz mbouj onj, dauq roxnynh miz raq rengz he, coicaenh de bae bangcoh dahsau najseng neix.

Dauqranz le, daxmeh naeuz Daenggangz caeuq Dahvei: “Gou gaenq heuh vunz yawj ngoenzndei lo, ndwenlab cibbet sou bae minzcnwngiz daenggeiq gonq, ndwencieng cogouj banh laeuj, sou naeuz yienhlawz?”

Ndaw daeh gaenq mbouj miz baenzlai ngaenz, Daenggangz lwnh hawj daxmeh caeuq Dahvei de baenzlawz bangcoh Vangz Cinggyah.

“Lwg ha, mwngz ndatsim bang vunz mbouj loek, simndei mehmbwn yawj ndaej raen. Mboujyawx sou bae minzcnwngiz daenggeiq gonq, gvaqlaeng caiq rom cienz banh laeuj.” Daxmeh Daenggangz naeuz.

“Sou huk gou mbouj caeuq sou huk, mwngz Daenggangz baenzneix guh, lij muengh gou byaij haeuj aen ranz neix daeuj dem? Sou gaej naemj!” Dahvei ndatheiq rim dungx.

“Ciuhvunz byawz cungj miz saekseiz mbouj swnh, raeuz bang vunz, doeklaeng hix miz vunz bang raeuz.” Daenggangz byaij coh Dahvei.

“Gou deq mwngz song bi, gizgyawj bouboux cungj rox gou yaek guh bawx mwngz, mwngz dawz cienz bae bang boux vunzseng he, cungj mbouj naemj daengz gou, raeuz byaij mbouj roengzbae lo!” Dahvei gangj sat, aeu fwngz goemq naj cuengq sing daejfwtfwt.

Raen Dahvei yienhneix, Daeng-

gangz caeuq daxmeh mbouj rox baenzlawz guh cij ndei. Daenggangz naemj le naemj, dawz mbaw gajngaenzhangz lw haj fanh maenz caeuq haj fanh maenz ndawranz comz ndaej, gyau hawj Dahvei. Ndae bit cienz neix, Dahvei lizhai mbanjranz, mbouj rox gvaq gyawz bae lo.

Daenggangz seizneix song fwngz hoengqhanghang, maz cungj mbouj miz lo. Aen ndwencieng neix, Daenggangz roxnynh dungx soemj raixcaix.

Haj

Gvaq cieng, Daenggangz youh aemq daeh okbae dajgoeng lo, de siengj caiq bae cangjubhnaeng guh-hong, youh lau bungzraen dahsau Vangz Cinggyah, bang vunz bang daengz daej, Daenggangz mbouj siengj dahsau boizcingz dauq hawj cihgeij.

Daenggangz youq rog guhhong, roxnynh cihgeij lumj benq fwj nei, youq gyangmbwn mbin bae mbin dauq, mbouj rox bae coh gyawz, hix mbouj rox daengz seizlawz cij ndaej dingz din. De vuenh le haujlai aen dieg, vuenh le haujlai aen cangj, roxnynh guhhong cungj mbouj rimhoz.

Mizseiz, Daenggangz lijdwg nyaenx mbouj ndaej naemj hwnj aen cangjubhnaeng, gizhaenx hong soeng youh ndaej ngaenz lai, naemj bae ngeix dauq, Daenggangz youh daeuj daengz aen singz gaxgonq dajgoeng neix.

Bet bi lo, gizneix bienq le haujlai, baenz benq baenz benq ranz-laeuz moqsaksak, sang’ vidvid, ci bae vunz byaij nauhyied raixcaix. Aen cangjubhnaeng haenx mbouj rox gaenq buen gvaq gyawz bae lo, seizneix gizde dwg aen denswj gunghsw hendeu.

Ra hong guh youqgaenj, Daenggangz mbouj caiq naemj baenzlai, yamq hung byaij coh aen denswj gunghsw hix bae.

“Aen gungsw hix sou lij ciu vunz lwi?” Daenggangz cam boux baujanh bakdou.

“Seizneix lij ciu geij boux, mwngz dawz sinhfwnwng hawj gou yawj gonq.” Baujanh naeuz.

Daenggangz muengz ndenq sinhfwnwng gvaqbae.

“Dou gizneix ciu boux ndaej cibbet bi daengz samcib haj bi, mwngz gaenq ndaej samcib roek bi, geq bi ndeu, mbouj ndaej lo.” Baujanh ngauz gyaiej vad fwngz naeuz.

“Lauxgo, gizsaed gou bineix ngamq ndaej samcib haj bi, caengz ndaej samcib roek bi, daxmeh gaxgonq soengq gou haeuj hagdangz doegsaw caeux, bauq geq bi ndeu lo.” Daenggangz naeuz.

“Yawj sinhfwnwng guh cinj, gangj gizwnq fouz yungh.” Baujanh najfonx naeuz.

“Lauxgo, doenghyienh mbouj ndaej bienq, vunz goj ndaej bienq, mazfanx mwngz caeuq boubdaez gangj sing ndeu.” Daenggangz depgaenh gvaqbae naeuz.

“Mwngz ndaek vunz neix, caeuq mwngz gangj mbouj ndaej doeng!” Baujanh gangj sat baenq ndang deuz lo.

Ra mbouj ndaej hong guh, Daenggangz miz di nyapnyuk, mbwn laep lo, de okbae youzbyaij gaij mbwq. Daenggangz youh byaij daengz diuz gai haenx, naemj hwnj gaxgonq gij saeh haenx, naemj daengz dahsau Vangz Cinggyah. Gwq naemj gwq naemj, Daenggangz ndawsim lumj raemxlangh fandoengh.

“Daeggo, dwg mwngz lwi?” Sawqmwh, Daenggangz dingqnyi baihlaeng miz vunz sing hung heuh de.

Daenggangz ngeux gyaiej baez yawj, raen dahsau gyaundeij youh nienznomj he ndwn youq baihlaeng.

“Daeggo, gou dwg Vangz Cinggyah, bet bi gaxgonq mwngz bang gou gvaq ne. Mbouj ngeix daengz youh youq neix bungz raen mwngz.” Dahsau youh angq youh doeksaet.

“O, gou geiq hwnjdaej lo, mwngz dwg Vangz Cinggyah dahnuengx, geij bi mbouj raen, mwngz caeuq daengnuengx baenzlawz yienh la?” Daenggangz riu naeuz.

Vangz Cinggyah doeg daihhag bizyez le, daengz aen gunghsw hix guhhong, seizneix gaenq dang hwnj ginghlij lo.

“Daeggo, gou roxnynh cungj miz saek ngoenz raeuz caiq doxraen, gou baez ndaejhoengq couh daeuj neix baenq, mbouj ngeix daengz baezneix caen bungzraen mwngz lo. Mwngz mbouj dwg ra hong ha, ngoenzcog mwngz bae aen gunghsw hix hwnjban ba.” Vangz Cinggyah muengh coh Daenggangz naeuz.

Daenggangz soqlaiz gaenx guh gaenx doengh uk, haeuj gunghsw mbouj geij nanz, ndaej boubdaez ndaw gunghsw yawjnaek, daez de dang boubguenjieix he, de caeuq Vangz Cinggyah itheij vih gunghsw okrengz. Songde ciengzciengz hawj fuzliyen soengq cienz soengq doxgaiq, hix gien haujlai cienz hawj hagseng dieggungz doegsaw.

Vangz Cinggyah naeuz: “Go-ngangz, gaxgonq mwngz bang gou, seizneix raeuz bang boubwnq, boux bang boux, lajbiengz couh yied daeuj yied raeujrub.”